

## Nowodhow an Seythen

05 / 08 / 08

Dalleth a wren yn unn gewsel a'n logo nowydh.

Kynth esa krodhval bras erbynn towl usya logo nowydh pan dhalleth UnnKernow... konsloryon re votyas rag spena arhans warnodho.

Byttegyns... I re gemeras bojet an moyha diger... pypm-ha-tri-ugens mil peuns.

Yth esa own bos hanter milvil spenys.

Lemmyn, yma an konsel ow leverel na vydh an logo gorrys war bubtra nesa bledhen y'n dalethvos.

Ni a wra y weles war arwodhyow konsel rag pub sodhva vras ha war dhyllas unnform a dus ow servya an bobel.

Y fydh an logo leshes pella wor'tiwedh pan vo edhom a dhaswul taklow koth.

Kyn klewyn hemma... nowodhow drog yw drefen nag eus hwans anodho dhe veur a dus.

Nebes huni a lever nag eus kudyn gans an bezonts... ha pyth yw kamm gans an balores?

Y fydh dhyn y'n le a henna... neppyth arnowydh haval orth flammow... po blew Amy Winehouse.

\*\*

An krunch kresys re dheuth warnan ha gorra gonisyow neyja yn-dann wodros yn Kernow.

BA a wra kildenna an neyjen ynter Tewyn Bleustri ha Gatwick mis Hedra. An kowethas a lever bos kost a venoyl-ayr re uhel y'n dedhyow ma.

Dell glewyn, yma kowethasow neyja erel ow striva erbynn prisyow y'n eur ma keffrys.

\*\*

An kreslu re asis dhe godha pub charj erbynn Tony Leamon.

Y feu ev dalhennys gansa y'ga swoup nans yw unnek mis hag I owth assaya kachya kenedhlegyon Gernewek.

\*\*

Y hyllir mos dhe Druru lemmyn dre fordh a bark ha marhogeth... po martesen park ha ride.

An park kerri nowyth dhe Ven Tri Mildir yw kevrennys gans an sita gans kyttrin.

Yma charj a unn peuns rag mos dhe'n gresen... ha dehweles.

Warlergh an konsel, an dowlen ma a wra trehi kerri yn Truru dre unn degves rann.

\*\*

Hag yma tyller Facebook nowyth dhe gov Chris Cadwur James.

Cadwur o Kernewegor da... ilewydh bryntin... ha gwylaskarer krev ha lel.

Selyes veu gwiasva Facebook gans onan a'y dhyskyblon.

Chons yw a berthi kov a Gernow bras y golon.

\*\*

Na vydh Nowodhow an Seythen nessa seythen... mes goslowewgh orth Radyo an Gernewegva nessa pennseythen rag klewes moy a ilow Kernewek... ha keskows y'n taves.

Tereba nessa.